



Sveitarfélagið
ÁRBORG

Reglur

Sveitarfélagsins Árborgar um daggæslu barna í heimahúsum

Hlutverk Sveitarfélagsins Árborgar er að veita dagforeldrum leyfi til daggæslu að uppfylltum skilyrðum reglugerðar nr. 907/2005 um daggæslu barna í heimahúsum, tryggja dagforeldrum aðgang að námskeiðum og hafa umsjón og eftirlit með starfsemi dagforeldra.

Daggæsla í heimahúsum felur í sér samning foreldra/forráðamanna við dagforeldri um að taka barn í gæslu. Mælt er með því að foreldrar og dagforeldrar skrifi undir samning um daggæslu.

I. kafli

Yfirstjórn, leyfisveitingar o.fl.

1. gr.

Yfirstjórn

Félagsmálanefnd veitir leyfi til daggæslu barna í heimahúsum. Eingöngu þeir sem hafa leyfi nefndarinnar hafa heimild til að taka greiðslu fyrir slíka gæslu. Um umboð starfsmanna fjölskyldusviðs Árborgar vísast til 2. gr. reglna þessara. Leyfi til daggæslu með sex börn eða fleiri er háð ákvæðum reglugerðar um hollustuhætti nr. 941/2002.

Félagsmálanefnd Árborgar ber ábyrgð á því að höfð sé umsjón og eftirlit með starfsemi dagforeldra sem hafa leyfi til daggæslu barna í heimahúsum.

Sé umsókn um leyfi til daggæslu í heimahúsi hafnað skal rökstuðningur fylgja ákvörðuninni.

Allar ákvarðanir sem teknar eru samkvæmt reglum þessum skulu kynntar hlutaðeigandi með tryggilegum hætti sem og kæruréttur til félagsmálanefndar og málsskotsfrestur.

Um málsmeðferð, þ.m.t. tímafrest, vísast til VI. kafla reglugerðar um daggæslu barna í heimahúsum nr. 907/2005.

2. gr.

Umboð starfsmanna fjölskyldusviðs Árborgar

Með reglum þessum veitir félagsmálanefnd Árborgar starfsmönnum fjölskyldusviðs Árborgar heimild til að taka ákvarðanir samkvæmt reglum þessum, þ.e. að veita leyfi til daggæslu, hafa með höndum umsjón og eftirlit með starfsemi dagforeldra og svipta dagforeldra leyfi.

3. gr.

Umsjón og eftirlit með daggæslu í heimahúsum

Starfsmaður fjölskyldusviðs hefur með höndum og ber ábyrgð á daglegri umsjón og ráðgjöf með daggæslu í heimahúsum. Í því felst að veita dagforeldrum stuðning, fræðslu og ráðgjöf, sbr. ákvæði 34. gr. reglugerðar nr. 907/2005 um daggæslu barna í heimahúsum. Að öðru leyti vísast til X. og XI. kafla reglugerðar nr. 705/2005 um daggæslu barna í heimahúsum.

Félagsmálanefnd felur starfsmanni fjölskyldusviðs Árborgar að fara með eftirlit með daggæslu í heimahúsum, sbr. Ákvæði 35. gr. reglugerðar nr. 907/2005.

4. gr.

Umsókn

Umsókn um leyfi til daggæslu barna í heimahúsum skal skilað á þar til gerðu umsóknareyðublaði inni á *Mín Árborg* á heimsíðu sveitarfélagsins Árborgar.

Starfsmenn fjölskyldusviðs veita umsókn um daggæslu viðtöku, fara yfir gögn, ræða við umsækjendur og heimsækja heimili þeirra.

Með umsókn skulu fylgja þau gögn sem fram koma í 13. gr. reglugerðar um daggæslu barna í heimahúsum nr. 907/2005, auk þeirra gagna sem tilgreind eru í 4. mgr.

Sé hundur og/eða köttur á heimili umsækjanda er auk þess gerð krafa um að umsækjandi skili ljósriti af leyfi til hunda- og/eða kattahalds, útgefnu af Sveitarfélaginu Árborg, staðfestingu á greiðslu leyfisgjalds og vottorði dýralæknis um ormahreinsun.

5 gr.

Bráðabirgðaleyfi og endurnýjun leyfa

Um bráðabirgðaleyfi og endurnýjun leyfa, m.a. ef dagforeldri skiptir um húsnaði og/eða nýr fullorðinn einstaklingur flytur inn á heimilið, vísast til 14. og 15. gr. reglugerðar nr. 907/2005 um daggæslu barna í heimahúsum.

6. gr.

Leyfissvipting

Um skilyrði og málsmeðferð vegna sviptingar leyfis til daggæslu í heimahúsum, þess að skilyrði til leyfisveitingar eru ekki lengur fyrir hendi eða annarra atriða sem benda til að ekki fari nægilega vel um barn hjá dagforeldri, vísast til XI. kafla reglugerðar nr. 907/2005 um daggæslu barna í heimahúsum.

7.gr.

Skilyrði fyrir leyfisveitingu samkvæmt reglum þessum eru:

1. Aldur: Umsækjendur mega ekki vera yngri en 20 ára þegar leyfi er veitt í fyrsta sinn. Dagforeldrar sem náð hafa 65 ára aldri fá leyfi endurnýjað til eins árs í senn.
2. Námskeið: Skilyrði fyrir veitingu leyfis er að umsækjandi hafi sótt starfsréttindanámskeið dagforeldra. Sveitarfélagið Árborg greiðir helming námskeiðsgjalds á móti umsækjanda vegna þátttöku á skyndihjálparnámskeiði sem haldið er annað hvert ár. Sveitarfélagið Árborg veitir stofnstyrk til nýrra dagforeldra að upphæð 100.000 kr.. Helmingur styrksins er greiddur við upphaf starfs og seinni helmingur þegar dagforeldri hefur starfað í átta mánuði. Dagforeldrar þurfa að sækja um styrkinn hjá fjölskyldusviði
3. Læknisvottorð: Umsækjandi leyfis þarf að skila inn læknisvottorði sem staðfestir að ekki hafi fundist merki um sjúkdóm sem hindrað geti að umsækjandi geti teki að sér barnagæslu. Einnig skal koma fram að aðrir heimilismenn hafi verið skoðaðir og ekkert athugavert fundist við heilsufar þeirra sem hindri samvistir við börn.
4. Umsögn/meðmæli: Umsögn síðasta vinnuveitanda eða meðmæli tveggja ábyrgra aðila.
5. Daggæsla í fjöleignarhúsi: Fari daggæsla fram í fjöleignarhúsi skal liggja fyrir samþykki annarra eigenda samkvæmt lögum um fjöleignarhús.
6. Daggæsla í leiguhúsnaði: Fari daggæsla fram í leiguhúsnaði skal liggja fyrir samþykki leigusala samkvæmt ákvæðum húsaleigulaga.
7. Sakavottorð: Sakavottorð umsækjanda og allra heimilismanna 15 ára og eldri skal liggja fyrir sem starfsmenn fjölskyldusviðs afla frá Ríkissaksóknara.
8. Húsakynni: Leiksvæði fyrir hvert barn skal að lágmarki vera 3 fm á gólfleti. Aðstaða til útivistar skal einnig vera hættulaus en jafnframt þarf að vera til staðar viðunandi aðstaða til hvíldar. Dagforeldri skal að lágmarki hafa 2 börn í gæslu. Ef um sex börn eða fleiri er að ræða skal liggja fyrir starfsleyfi heilbrigðiseftirlits Suðurlands í samræmi við reglugerð um hollustuhætti.
9. Brunavarnir: Fyrir liggja skoðun eldvarnareftirlits á heimili umsækjanda en reykskynjari, eldvarnarteppi og slökkvitæki skulu vera í íbúðinni.

10. Lóð, leiktæki og leikföng Lóð, leiktæki og leikföng skulu uppfylla ákvæði reglugerðar um hollustuhætti, reglugerðar um öryggi leikvallatakja og leiksvæða og eftirlit með þeim og reglugerðar um öryggi leikfanga og hættulegar eftirlíkingar eftir því sem við á.

11. Afskipti barnaverndarnefndar: Starfsmaður barnaverndarnefndar veitir umsögn um að umsækjandi hafi ekki orðið uppvís að broti á barnaverndarlögum eða hafi verið grunaður um slíkt. Hafi barnaverndaryfirvöld haft afskipti af umsækjanda meta starfsmenn fjölskyldusviðs Árborgar umsóknina út frá afskiptum barnaverndar.

II. kafli

Ábyrgð og skyldur foreldra

8.gr.

Ábyrgð foreldra

Ákvörðun um vistun barns hjá dagforeldri og val á þeim er ætíð á ábyrgð foreldra.

Foreldrar skulu kynna sér ítarlega reglugerð nr. 907/2005 um daggæslu barna í heimahúsum sem og reglur þessar.

Á foreldrum hvílir viðtæk ábyrgð og skylda til að upplýsa dagforeldra um alla þá þætti sem snerta venjur, sérþarfir og annað sem skiptir máli fyrir velferð barns.

Á foreldrum hvílir einnig sú ábyrgð að kynna sér vel allar aðstæður hjá dagforeldri í upphafi gæslu og fylgjast reglubundið með aðbúnaði barns meðan á gæslu stendur. Í þeim samskiptum skulu foreldrar virða það að um heimahús er að ræða.

Um ábyrgð, skyldur og réttindi foreldra vísast til VIII. kafla reglugerðar nr. 907/2005 um daggæslu barna í heimahúsum.

9. gr.

Skyldur foreldra

Í samráði við dagforeldri skal gefa barni aðlögunartíma í samræmi við þarfir þess við upphaf vistunar og skal foreldri vera með barninu eftir þörfum.

Foreldrar skulu semja sérstaklega um dvalartíma barns. Breyting á dvalartíma er óheimil án samþykkis dagforeldra.

Foreldrar skulu ekki koma með veikt barn í gæslu.

Foreldrum ber að tilkynna dagforeldri um veikindi barns eins fljótt og kostur er.

Foreldrar, eða aðrir nákomnir, sem koma með og sækja barn, skulu klæða barn í og úr utanyfirfötum.

Börn skulu vera hrein og í hlýlegum fötum og hafa meðferðis fatnað til skipta og skjólfatnað.

Foreldrar skulu gefa dagforeldrum nákvæmar upplýsingar um hvernig hægt er að ná sambandi við þá meðan á gæslu stendur. Skylda er að tilkynna ef breytingar verða að þessu leyti.

Til að fylgjast með öryggi, líðan, þroska og þörfum barns hjá dagforeldrum skulu foreldrar hafa frumkvæði að virkum samskiptum við dagforeldra og leitast við að hafa þau samskipti hreinskilin og óþvinguð. Í þeim samskiptum skulu foreldrar virða það að um heimahús er að ræða.

Mikilvægt er að foreldrar og dagforeldrar virði gagnkvæman uppsagnarfrest.

Telji foreldri daggæslu ábótavant og/eða ef hann telur að dagforeldri uppfylli ekki lengur skilyrði leyfisveitingar skal, hann strax tilkynna það til fjölskyldusviðs Árborgar.

III. kafli

Ábyrgð og skylda dagforeldra

10 gr.

Ábyrgð dagforeldra

Dagforeldrar bera ábyrgð á öryggi og andlegri og líkamlegri velferð barns meðan á daggæslu stendur. Dagforeldrar skulu hlúa að barni í sem víðtækustum skilningi. Þetta á jafnt við um fæðuval, leiki, leikföng, hreyfingu, útiveru, tilfinningalíf og félagslega líðan barns. Með öllu er bannað að beita barn andlegu eða líkamlegu ofbeldi.

Dagforeldrar skulu kynna sér ítarlega reglugerð nr. 907/2005 um daggæslu barna í heimahúsum sem og reglur þessar.

Á dagforeldrum hvílir víðtæk ábyrgð og skylda til að afla upplýsinga hjá foreldrum um alla þá þætti sem snerta venjur, sérþarfir og annað sem skiptir máli fyrir velferð barns.

Allar upplýsingar sem dagforeldrar fá um aðstæður og hag barns og/eða fjölskyldu skal fara með sem trúnaðarmál, með þeirri veigamiklu undantekningu sem fram kemur í 17. gr. barnaverndarlaga nr. 80/2002 um tilkynningaskyldu til barnaverndarnefndar, sbr. og 6. mgr. 10. gr. reglna þessara. Dagforeldrar skulu undirrita drengskapsheiti við leyfisveitingu.

Um ábyrgð og skyldur dagforeldra vísast til IX. kafla reglugerðar nr. 907/2005 um daggæslu barna í heimahúsum.

11. gr.

Skyldur dagforeldra

Foreldrar eiga rétt á upplýsingum frá dagforeldrum um dagskipulag í grófum dráttum, matseðil í meginatriðum og aðra starfsemi utan heimahúss.

Foreldrar eiga rétt á að vita hversu mörg börn eru allt í daggæslunni, aldur þeirra og dvalartíma.

Einnig skulu dagforeldrar leita samþykkis foreldra fyrir flutningi barns í einkabifreið meðan á gæslu stendur.

Dagforeldrum er skylt að stuðla að öryggi barna í hvívetna meðan á dvöl stendur. Um öryggi barna vísast nánar til 29. gr. reglugerðar nr. 907/2005 um daggæslu barna í heimahúsum.

Mikilvægt er að dagforeldrar og foreldrar virði gagnkvæman uppsagnarfrest.

Verði dagforeldrar þess áskynja að barn búi við óviðunandi uppeldisskilyrði, verði fyrir áreitni eða ofbeldi, er því skylt að gera barnaverndarnefnd viðvart, sbr. 17. gr. barnaverndarlaga nr. 80/2002.

IV. kafli

Gildistaka o.fl.

11 gr.

Gildistaka

Reglur þessar eru settar með vísan til 33. gr. reglugerðar nr. 907/2005 um daggæslu barna í heimahúsum.

Reglurnar öðlast gildi við staðfestingu bæjarstjórnar Árborgar.

Reglur þessar voru samþykktar í félagsmálanefnd 28. apríl 2020, í bæjarráði 7. maí 2020 og staðfestar í bæjarstjórn Árborgar 27. maí 2020.

Reglur um niðurgreiðslu daggæslu barna í heimahúsum í Sveitarfélaginu Árborg

Reglur þessar gilda um niðurgreiðslur Sveitarfélagsins Árborgar vegna daggæslu barna í heimahúsum í Árborg. Niðurgreiðsla er greidd til lækkunar á daggæslugjöldum foreldra.

1. gr. Réttur til niðurgreiðslu

Í Sveitarfélaginu Árborg geta allir foreldrar sem vista börn sín hjá dagforeldrum sótt um niðurgreiðslur vistunargjalds. Réttur til niðurgreiðslu gildir að hámarki ellefu mánuði á ári. Engar niðurgreiðslur eru vegna barns sem skráð er í leikskóla og dvelur í daggæslu meðan á sumarleyfi leikskólans stendur. Dagforeldri er heimilt að loka daggæslu vegna námskeiðsdags tvo daga á ári. Einnig er heimilt að loka tvo daga á mánuði vegna tilfallandi eigin veikinda eða veikinda barna, þessir dagar eru ekki uppsafnanlegir. Loki dagforeldri umfram framangreint lækkar niðurgreiðsla hlutfallslega. Dagforeldri ber að tilkynna foreldrum og daggæslufulltrúa/leikskólaráðgjafa um lokum umfram framangreinda daga eigi síðar en 15. dag mánaðar áður en leyfi hefst þannig að til lækkunar niðurgreiðslu komi í þeim mánuði er umframlokun á sér stað.

Sveitarfélagið Árborg áskilur sér rétt til að kanna hvort farið er að reglum þessum, t.d. með skoðun gjaldskrár, dvalarsamninga og reikninga til foreldra.

2. gr. Skilyrði niðurgreiðslu

Niðurgreiðslur eru háðar eftirfarandi skilyrðum:

*Skilyrði niðurgreiðslu til lækkunar daggæslugjalda er að skráð lögheimili barns í þjóðskrá og föst búseta þess sé í Árborg.

* Forsjárforeldri sækir um niðurgreiðslu í gegnum Mína Árborg á heimasíðu Árborgar. Endurnýja þarf umsókn um niðurgreiðslu ef skipt er um dagforeldri.

* Að dagforeldri hafi leyfi félagsmálanefndar Árborgar til daggæslu á heimili sínu.

*Einstæðir foreldrar geta sótt um niðurgreiðslu frá og með fyrsta mánuði eftir að barn nær 6 mánaða aldri.

*Foreldrar í sambúð og hjónabandi geta sótt um niðurgreiðslur frá og með fyrsta mánuði eftir að barn nær 10 mánaða aldri.

*Niðurgreitt er mánaðarlega. Greitt er fyrirfram fyrir hvern mánuð, fyrsta virkan dag í hverjum mánuði. **Ef dagforeldri skilar inn upplýsingum eftir 20. dag mánaðarins getur það leitt til þess að ekki sé unnt að greiða fyrirfram vegna næsta mánaðar á eftir.**

*Ef breyting/uppsögn verður á vistunartíma barns ber dagforeldri og foreldrum að tilkynna það til fjölskyldusviðs eigi síðar en 15. dag mánaðar áður en breyting á sér stað. Gagnkvæmur uppsagnarfrestur vegna breytinga er einn mánuður og skal breyting miðast við 1. og 15. hvers mánaðar.

*Ef dagforeldri verður vart við mistök í niðurgreiðslu ber því að tilkynna til fjölskyldusviðs án tafar.

*Komi í ljós að Sveitarfélagið Árborg hafi ofgreitt niðurgreiðslu af einhverjum ástæðum, t.d. vegna rangra upplýsinga frá dagforeldri, mun Sveitarfélagið Árborg lækka niðurgreiðslu til dagforeldris við næstu greiðslu sem því nemur eða krefjast endurgreiðslu. Heimilt er að krefjast endurgreiðslu þrátt fyrir að barn sé hætt í daggæslu. Ef ekki reynist unnt að skuldajafna fer krafan í innheimtu sem hefur í för með sér vaxta- og innheimtukostnað. Jafnframt hefur Sveitarfélagið heimild að veita dagforeldrum áminningu fyrir slíkt.

3. gr. Fjárhæð niðurgreiðslu

Fjárhæð niðurgreiðslu miðast við vistunartíma barns og greiðist af dagforeldri sem lækkar vistunargjald foreldra sem því nemur. Hámarksendurgreiðsla er sem hér segir:

- * Fyrir fjögurra tíma vistun 32.500 - krónur.
- * Fyrir fimm tíma vistun 40.625 - krónur.
- * Fyrir sex tíma vistun 48.750 - krónur.
- * Fyrir sjö tíma vistun 56.875 - krónur.
- * Fyrir átta tíma vistun og meira 65.000 - krónur.

Systkinaafsláttur er milli leikskóla, frístundar og dagforeldra og reiknast afslátturinn alltaf á elsta barn. Hlutfall afsláttar er 50% með öðru barni og 100% með þriðja barni.

4. gr. Gildistaka o.fl.

Reglur þessar eru settar samkvæmt heimild í 42. gr. reglugerðar um daggæslu barna í heimahúsum nr. 907/2005.

Reglurnar taka gildi 1. febrúar 2013. Reglurnar skal endurskoða árlega í tengslum við gerð fjárhagsáætlunar sveitarfélagsins.

Breyting á fjárhæð niðurgreiðslu skv. 3. gr. var samþykkt í fjárhagsáætlun 2013 í bæjarstjórn Árborgar 21. nóvember 2012.

Breyting var aftur gerð í fjárhagsáætlun 2014.

Breyting á fjárhæð niðurgreiðslu skv. 3.gr. var enn gerð 30.mars 2017 í ofanstandandi upphæðum.

Breytingar á fjárhæð niðurgreiðslu skv. 3.gr. eru gildar frá 1.mars 2018 í ofanstandandi upphæðum.

Samþykkt í bæjarráði 7. maí 2020 og í bæjarstjórn 27. maí 2020